



Publicaziuns dalla vischnaunca, jamna 47

Votaziuns federalas e votaziun communalas dils 29 da november 2020

L'urna principala en casa communalas ei aviarta sco suonda:
Dumengia, ils 29-11-2020, 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediat, denton **sil pli tard entochen venderdis, ils 27 da november 2020, allas 17.00** tier l'administraziun communalas (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun, metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communalas saveis Vus tarmetter cun posta (supplicau da francar) ni directamein fierer en la scaffa da brevs dalla casa communalas.

Ils cedels da votar ston esser sil pli tard la **dumengia, ils 29 da november 2020** allas 11.00 tier l'administraziun communalas.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communalas

Damondas da baghegiar

2020-1069.000

Datum dalla publicaziun: 20 da november

Ils patrons: Irene e Hans Huonder-Schönenberger, Via Faltscharidas 1, 7180 Disentis/Mustér
Object: Sanaziun dalla pegna en in scaldament d'aria, parcella 1733, Via Faltscharidas 1, 7180 Disentis/Mustér

2020-1070.000

Datum dalla publicaziun: 20 da november

Ils patrons: Markus e Miriam Rigoletth-Deonau, Gassa da Cuoz 31, 7186 Segnas
Il representant: Perazzelli Metallbau AG, Freihofstrasse 30, 7302 Landquart
Object: Cuvrida dalla terrassa existenta, modificaziun dil curtin e colurar las fatschadas dil baghetg annex, parcella 1213, Gassa da Cuoz 31, 7186 Segnas

Protestas:

Ils plans da construcziun ein deponi tier l'administraziun communalas. L'investa publica cuoza 20 dis dapi il datum dalla publicaziun. Eventualas protestas encunter sura damondas da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 20 da november 2020
Uffeci da baghegiar Disentis/Mustér



Cussegl da vischnaunca

Rapport dalla seduta dils 13-11-2020

En sia seduta dils 13 da november 2020 ha il cussegl da vischnaunca, sut il tgamun da Mario Flepp, verificau l'elecziun dalla suprastonza communal per la perioda d'uffeci 2021–2024.

La tractaziun dil preventiv 2021 ei vegnida tgamunada da vicepresident Giusep Lozza. Sin proposta dalla suprastonza communal ha il cussegl decidiu da risguardar supplementarmein el preventiv 2021 ils cuosts per reparar ils donns dallas malauras digl october 2020 ella summa netta da frs. 301300.–. Sin fundament dallas novas informaziuns e las consequenzas dil coronavirus ha il parlament plinavon augmentau la contribuziun al Spital regional Surselva per frs. 55 000.–. Suententer aver decidiu duas ulteriuras adattaziuns preveda il preventiv dil quen da gudogn e sperdita 2021 expensas da frs. 16,081 milliuns e recavs da frs. 16.336 milliuns. Aschia resulta in surpli d'entradas da frs. 255 100.–. Il cashflow ei cun frs. 956 600.– plitost mudests.

Dallas investiziuns nettas da rodund 5,973 milliuns francs pertuccan rodund frs. 1,6 milliuns l'innovaziun ed amplificaziun dil Center Fontauna, frs. 1,4 milliuns vias communalas e frs. 1,12 milliuns la sparta ambient e planisaziun (canalisaziun, serenera, economisaziun da rumien e deponias).

Il cussegl da vischnaunca ha suenter ina buna e fundada discussiun e cun risguardar sura adattaziuns approbau unanimamein il preventiv 2021, fixau il pei da taglia sin entradas e facultad sin 120% e la taglia sin schischom sin 1,7%o (sco entochen dacheu).

Suprastonza communal

Referendum facultativ

A caschun da sia seduta dils 13 da november 2020 ha il cussegl da vischnaunca suenter haver fatg entginas adattaziuns approbau unanimamein il preventiv 2021. Conform ad art. 21 lit. a dalla constituziun communal ei quella decisiun suttamessa al referendum facultativ. Il messadi tiel preventiv 2021 (incl. annexas) ei exponius per investa en casa communal (stanza nr. 10).

Enteifer 20 dis dapi la publicaziun officiala han 80 votantas e votants la pusseivladad d'inoltrar enviers sura conclus il referendum e pretender ina votaziun dil pievel.

Suprastonza communal

Referendum facultativ spirau

A caschun da sia seduta dils 16 d'october 2020 ha il cussegl da vischnaunca approbau unanimamein il project per la construcziun dalla senda naven da Cuolm da Vi a Stgeinas e concediu persuententer in credit brut da frs. 299 400.–.

Encunter quella decisiun ei enteifer il termin fixau buca vegniu fatg diever dil referendum, aschia ch'ella ha contonschiu vigur legala.

Suprastonza communal



Via Run/Via Funs-Dado

Serrada temporala dalla via durant las lavurs vid la cuvrada

Naven da **mardis, ils 24 entochen gievgia, ils 26 da november 2020** succedan las lavurs vid la cuvrada dalla Via Run e dalla Via Funs-Dado. Durant quellas lavurs ei igl access cun vehichels a motor impediud. Per quei temps vegnan singuls tschancuns dalla via mintgamai serrai la damaun naven dallas 7.30 entochen la sera allas 17.30. Nus supplichein vischinas e vischins d'observar la signalisaziun resp. las directivas dall'interpresa da construcziun.

Igl access a pei ei da tut temps pusseivels. Durant las uras che la via ei serrada astga tenor basegns vegnir fatg diever dils parcadis dalla surbaghegiada «Cucagna». La damaun e la sera ei il transit cun vehichels motorisai pusseivels. Durant il di ei il transit a pei ni cun velo adina pusseivels. Tenor svilup dall'aura vegn la sonda dils 27 da november risguardada sco reserva.

Nus engraziein per la capientscha e selegrein ch'ils disturbis da traffic van plaunsiu a fin.

Disentis/Mustér, ils 18 da november 2020

Survigilanza da construcziun

Uffeci da baghegiar ed infrastruttura Disentis/Mustér

Corporaziun d'aua Spina da Vin

Posiziun davart la situaziun en la Val Clavaniev en connex cul project d'avertura Val Segnas–Val Sogn Placi

Preziadas commembras, prezias commembers. Ils **29 da november 2020** ha il pievel da Mustér da votar davart il project d'avertura Val Segnas–Val Sogn Placi. Durant las davosas jamnas essas Vus adina puspei vegni informai davart quei project. En rama da quellas informaziuns ei era vegniu visau vi sin la situaziun dil territori dallas tschaffadas en la Val Clavaniev.

Tenor art. 78 dalla constituziun communal ha la vischnaunca delegau las incaricas davart il provediment d'aua allas corporaziuns d'aua. Enteifer la lescha davart il provediment d'aua vegnan las corporaziuns incumbensadas da prender tuttas mesiras per schurmegiar e garantir l'aua da beiber (art. 3).

La suprastonza dalla Corporaziun d'aua Spina da Vin ha persequitau attentamein tuttas orientaziuns ed informaziuns davart il project d'avertura. Deplorablamein ha la suprastonza stuiu constatar ch'ei vegn adina puspei cun differents arguments empruau da sugerir ina segirtad fallida davart la situaziun en la Val Clavaniev. La suprastonza dalla Corporaziun d'aua Spina da Vin sa buca sustener l'argumentaziun dallas autoritads communalas davart la situaziun en la Val Clavaniev.

Il provediment d'aua cun ils differents territoris da tschaffadas ei in construct fetg complex e sensibel. Ord tal motiv ei la suprastonza dalla corporaziun d'aua sedecidida da metter a disposiziun sin la pagina d'internet (www.spinadavin.ch) ulteriuras informaziuns e datas che dueien possibilizar a Vus da giudicar meglier la situaziun.

La suprastonza dalla Corporaziun d'aua Spina da Vin ei pertscharta ch'igl uaul da schurmetg ha ina fetg gronda impurtonza per il vitg da Mustér e basegna in bien access per la tgira e cultivaziun. Tonaton astgein nus buc emblidar che las reservas da tschaffadas cun auo d'aulta qualitat ein limitadas.

Corporaziun d'aua Spina da Vin

www.spinadavin.ch

La suprastonza



Controlla da habitonts

Mortori

Leci Antoni Sialm-Pally, naschius ils 10 da zercladur 1936, morts ils 10 da november 2020

Pro Junior Grischun, district Cadi

L'uniun Pro Juventute Grischun ha midau num e senumna da niev Pro Junior Grischun. Igl intent resta denton il medem: s'engaschar per affons e giuvenils ella Cadi. La vendita da marcas ed auters products ha era liug quest atun. Muort il coronavirus vegnan las cuviartas buca repartidas dalla scola ella Vischnaunca Disentis/Mustér, Medel/Lucmagn e Tujetsch. Ina part dallas cuviartas havein nus saviu distribuir, denton buca a tuttas casadas. Tgi che ha buca survegniu ina cuviarta sa bugen far l'empustaziun sur la stizun online, il link leutier sco era ulteriras informaziuns anfleis sin la pagina d'internet www.projuniorcadi.ch. Cun Vossa cumpra sustenis Vus projects per affons ella Cadi.

Engraziel fetg.

Seniora-Ca

Allas senioras ed als seniors da Mustér

Corona per la secunda gada, gie, ella ha «lagutiu» las duas occurrenzas preferidas – gentar en Aua Viva dils **26 da november** e Sontgaclau dils **6 da december 2020**. Speronza essas vus tuttas/tuts stai schurmegiai dil virus. Per mussar che nus, l'uniun da dunnas e Seniora-Ca, havein buc emblidau vus, lein nus purtar en vies ambient in tec fried d'advent cun in pign «regal» per mintgin/a! Nies cuschinier da Seniora-Ca (Placi Lozza) fa pliras sorts mams, pachetescha quels en in bi satget. Aschia sa mintgin/a guder in tec «cuminonza»! Cu? **Gievgia, ils 3 da december 2020** naven dallas 9.45–11.45 sper halla Cons. Vegnir sez ni schar purtar, sche essas buca bein a pei ni veis negin transport! Secapescha cun mascrina (schurmetg da Corona)! Co? Annunzia cun indiar cons satgets – vegnel mezza/mez ni adressa da furniziun. (tel. Puntreis 081 929 56 56 tochen venderdis, ils 27 da november 2020 allas 16.00)

Post d'informaziun Seniora-Ca

Uniun samaritana Mustér

Donaziun da saung el temps da Corona

La donaziun da saung ei lubida e necessaria per segirar las reservas da saung. Las donaturas ed ils donaturs sco era il persunal han da setener vid las prescripziuns da segirtad, aschia che tuts ein obligai da purtar ina mascrina. Nus engraziein ordavon per Vossa capientscha. L'acziun da spender saung dallas vischnauncas da Medel e Mustér ha liug: **Gliendisdis, ils 30 da november 2020**, dallas 18.00–20.00 en halla Cons.

Nus engraziein grondamein per quei bien survetsch en favur da malsauns e disgraziai e sperein sin ina stedia participaziun.

Uniun samaritana Mustér
